

T E X T S R A D I O S C O L A

Pieder Antoni Livers

GIACHEN CASPAR MUOTH

en la glisch della casa paterna e dil vitg natal



EDIZIUN DELLA CUMINONZA RADIOROMONTSCH
PUBLICAZIUN DELLA CUMISSIUN RADIOSCOLA

REDACZIUN: ALFONS MAISSEN -

Nr. 30

S I N V I A

Entras in schabetg pauc legreivel, gie nuncapeivel e misterius, ei il relasch de Giachen Caspar Muoth ius a piarder, svanius, - forse per adina! Mintga generaziun sesenta il basegns de seprofundar danovamein els documents relaschai d'in dils pli valents umens. Ei quei pusseivel oz? - Bein sesanflan tscheu e leu, en mauns privats, enqual brev u outra scartira derivonta da Muoth. Mo quellas ein buca contonschiblas senz'auter. Secapescha che l'ovra dil poet sto star el center de nies interess, sco basa de studi ed analisa, per mied d'instrucziun e de formaziun artistica e spirtala. Mo mintga memoria veseivla gida a completar il maletg e la capientscha de nos gronds umens. Tgei schess ins d'in archiv MUOTH? - rimnond originals accessibels e fagend copias dils buca recaltgabels! Niev slonsch per in studi pli intensiv e profunda de quella remarcabla personalitad fuss segir ina biala e meriteivla consequenza. - Schizun la casa nativa de Muoth, la casa mulin la resgia, en sper il spimond FLEM, al pei dil Crest sogn Sievi, la casa dil fuorn enta Cuort, dimora de pli tard della famiglia Muoth, savessen revelar regurdientschas preziasas. La casa mulin la resgia sco era quella tscheuora a miez il vitg, eran penetradas d'in traffic mistergnerpuril d'atgna tempra. Il ruclar dell'aua giu per canals e roda gronda, sco era il tarlaccar e bigiatar dil mulin, e buca il davos las furnadas dil meglier e bi paun fatgs de sia mumma per sesez e cunzun per il vischinadi, ein stai per il poet e scienziat Muoth de immensa impurtonza. Era la stiva de Muoth, representada en Radioscola, ei ina memoria veseivla dil crescher e prosperar dil giuven Muoth mattatsch e student, e pli tard dil professer durent sias vacanzas a Breil.

En quei carnet vein nus il plascher de reproducir l'emissiun entira entratga de scolast secundar Pieder Antoni Livers de Breil. Livers ha buca semplamein copiau ils emprems biografs de Muoth. El presenta niev ed impurtont material recaltgaus d'umens d'aula vegliadetgna, che han buca mo enconuschiu Muoth sez, mobein era siu bab Mattiu, sias relaziuns, sia carschen e sia digren.

Cuera, ils 20 d'october 1961

Alfons Maissen

GIACUN CASPAR MUOTH
en la glisch della casa paterna
e dil vitg natal

Da Pieder Antoni Livers

SI MUNTATSCH

Vul ti ver Muntatsch, il vitg,
stos ti reiver sin in spitg.
Vegnas ti in di de stad,
va ei vess de trer il flad;
mo eis ti lu arrivaus,
pos ti esser consolaus .

In'ustria sper la via
dat albiert cun curtesia:
aria frestga, aria fina,
bien schambun e vin Valtlina
che l'ustiera fa amogna,
scatschan spert tia ragogna.

Cheu sesarva lunsch entuorn
in fritgeivel bi contuorn:
tgiembels, spundas e planira,
praus e pradas en verdira,
selvas spessas e pastira
circumdeschan la cultira,
e sisur gl'ual tarlisch
l'alp al pei de pezza grischa.
Sur in tgiembel giu serasa
leu il vitg ord casa, casa;
e sisum il tgiembel mira
la baselgia giun cultira.

Aschia tuna l'entschatta della poesia culla surscripziun:
SI MUNTATSCH, che formescha ina biala part digl epos hu-

moristic: LA PASCULAZIUN, scretts dal capo-poet romontsch GIACUN CASPAR MUOTH. - E quei "Muntatsch" ei il vitg de Breil cun siu bi e fritgeivel cuntuoorn, culs praus savurus ed ers undegionts, aclas e pradas enramadas d'in tscherchel d'uaul stgir-verd. E sur quei uaul protegend che mitighescha il clima local s'extendan las 5 alps della vischnaunca de Breil al pei digl imposant Péz Tumpiv e gl'aultdil pass Lembra.- Cheu amiez quei pittoresc e bein proporzionau schai il vitg de Breil, tschentaussco sin ina largia, bracca scantschalla, dalla quala anora l'egliada tonscha sur la gronda part della Cadi e della Foppa.

Che la biala pastira de Breil cun atgna veglia e sauna tradiziun ed usits purils ha giu gronda influenza sil patertgar ed agir dil poet Giacun Caspar ei bein capeivel e tut natural. Quei ei silsuentar era semussau en siu operar litterar. Ils biars motivs e maletgs en sia prosa e poesia ein impressiuns plantadas en si'olma dal viver ed agir de siu pievel puril en siu carezau vitg patern. - Muoth steva era damaneivel all'istoria ed influenza de grondas personalitads de Breil, principalmein dil 18avel e 19avel tschentaner. Nus patertgein cheu principalmein als representants dellas famiglias de LATOUR e BALETTA, che han da tschentaners enneu furniu litterats, politichers ed officiers de grond renum, sco per exempel il colonel en survetsch franzos Caspar Adalbert de Latour (1724-1808), lu ses dus fegls, il general Caspar de Latour (1782-1885) e siu frar, il grond politicher grischun, Landrechter Pieder Antoni de Latour, ch'ei morts 1864, pia cura che Giacun Caspar Muoth veva 20 onns. El ei igl autur d'ina cumedia LA DERTGIRA NAUSCHIA e d'ina canzun dils retgs, che vegn aunc oz cantada da Buania a Breil.

Dalla famiglia Baletta lessen nus numnar: Duitg Baletta, il secund davos Bannerherr della Cadi ed autur dils interessants DIARIS dil temps della revoluziun franzosa. Lu siu fegl colonel Giacun Ludovic Baletta, il bab digl enconuschent ALEXANDER BALETTA, ch'ei staus in bien e beinvulent amitg de Giacun Caspar Muoth.

Cheu en quei Breil cun tonta reha istoria ed ierta spiritala ei Giacun Caspar Muoth naschius ils 29 de settember 1844 en la pintga casa dil mulin, situada sper il Flem, in ual che ha da lezzas uras probabel buca sminau che si' aua vegni suenter biebein loo onns ad esser schi custei-

vla e cheutras dar la caschun de ton politisem per amur de sia utilisaziun! -- Sur la casa nativa de Muoth sesaulza igl ault crest sogn Sievi che porta sco cruna la veglia baselgia cun la massiva tuor romana che datescha dal 9avel tschentaner. Ina baselgia historicamein zun interessanta che dat perdetga de veglia cultura.

Giacun Caspar veva aunc ina sora pli veglia, ch'ei denton morta cun circa 20 onns. Entuorn ils 1850 secolocheschan ils geniturs cun lur dus affons o en la gronda casa dil fuorn, circa amiez la scheina de Cuort. La venerabla casa ha dapi lu strusch midau la fatscha, e sdhe vus scolars fageis ina gada in viadi de scola a Breil, sche anfleis vus gleiti ella, pertgei sur gl'esch -casa stat ina tabla commemorativa cun l'inscripziun:

CASA PATERNA
DIL POET SURSILVAN ROMONTSCH
GIACHEN HASPER MUOTH
N. 29. IX 1844, M. 6. VII 1906

DEDICAU DALLA ROMANIA

Cheu ha il poet passentau ses bials onns d'affonza ed em-priu d'enconuscher legria e ventira, mo era quitaus e travaglias d'ina prusa communitad de puraglia. -

MATTIU MUOTH, il bab de Giachun Caspar, era da lezzas uras, pia circa els 1860, in purun che cargava bie-bein 30 tgaus biestga, e quei veva num Vus! El stueva ver sur onn dus fumegls e duas fumitgasas, e durent il temps d'arar e fenar cattava el aunc glieud jastra per dumignar il grond stausch de lavur. Quei caschunava naturalmein debia expensas ad el, schegie che las pagas eran da lezzas uras buca aschi grondas sco oz, era sch'ins risguarda la conjunctura hodierna. - Mo il daner ch'el incassava per circa 9 genetschas ni vaccas ch'el saveva vender, tun -schevan beinmaneivel per cuvierer quellas expensas ed aunc de far reservas, beincapiu, . . . sch'el fuss staus in bien econom e pli fermes el dun della retenientscha! Il Mattiu era in originalun malruasseivel, de caracter bravamein nunstabil; el era aggressiv e saveva vegnir furibunds en moda violenta e nauscha; cuortamein detg: el saveva ch'el era pussents e sefidava, sco ins di. Aschia era el habels

ded ir cun in pèr genetschas a marcau giu Glion e vegnir magari pèr suenter 8 - lo dis a casa, naturalmein cul cuntegn della buorsa bravamein decimaus! Ch'igl alcohol era durent quellas "vacanzas" a Glion siu pli stateivel, mo era prigus e fatal cumpogn, ei ualti clar. Meinsvart eran sias attaccas e stigems e filibergas la caschun de tussegadas dispetas e scenas pauc bialas e savens aunc bia meins rendeivlas pil Mattiu. Igl ei stau per el e sia famiglia, oravontut per siu fegl Giacun Caspar de grondissim donn, che sia pissiun era schi vehementa, che siu agir vargava savens ils tiarms dil saun giudezi. L'arroganza ed il spèrt de mai vuler ceder e buca saver s'accordar e s'acomodar, ein mai stai qualitäts per promover il beinstar, ni dil singul ni della communidad, ni lu ni oz! - Dil rest era Mattiu in um fetg intelligent, spirtus e pleins de viva fantasia ed intuiziun. El capeva de far hilaritad, de dir sgnoccas ch'ei deva risadas; e strihadas suaradas savev'el dar, savens tut en rema, ch'igl attaccau saveva buca tgei rispunder, dil surstaus ch'el era. Umens e femnas els 90 onns che vivan aunc oz (1961) a Breil, san rispunder e risdar reminiscenzas tipicas de Mattiu Muoth.- Inagada veva la radunonza della pleiv a Breil de concluder ina pli gronda expensa. Suentar ch'il votant ha giu motivau quella, damonda Mattiu Muoth il plaid e di: "Mes vischins, vus stueis buc emblidar ch'il zenn de miert paga negins deivets." Pertgei quella remarca? Cun quels plaids lev'el dir ch'ils vegls presents sappien bein concluder e procurar l'expensa, els vegnien denton gleiti a murir, epi sappien ils vegnend-suentar lu rumper il tgau co pagar quella. Mattiu Muoth era insumma empau in criticaster e sia schenadadad era fetg minima. Agl organist de gliez temps, ch'el veva buca per cor, ha el ina gada fatg la remarca: "Sche ti calas buca de sunar, sto la Baselgi'a ti scumandar!" - Igl ei negin dubi ch'il P O E T Giacun Caspar ha artau il dun poetic e musical da siu bab Mattiu. -

Mattiu Muoth veva era in'onda, veglietta, numnada la Tuora pintga. Ina dumengia d'unviern, cura che quella va a viaspras, dat in squatsch neiv giud tetg-baselgia e sco miserau gest giu per la schlappa all'onda pintga. Il Mattiu ch'era casualmein ualti dasperas seglia vitier e di ad ella cun l'adequata gesticulaziun: "O con bugen vess jeu cuiu a ti il sogn e perpeten ruaus!" La bun'onda hagi pari rispundiu ualti sec, mo buca priu la malvuglida remarca aschi tragica, pertgei ch'ella enconuscheva il Mattiu pli bein che zatgi. - -

Il pli savens sut ils dents veva Mattiu igl Assistent X, che era staus igl administratur de siu fatg duront la scussion e che veva era sco official exequiu quella. La primavera suenter sia scussion veva il vischinadi de Breil d'eleger in talpè. "Jeu spetgel proposiziuns per in talpè, cloma il gerau alla radunonza dils vischins. Mattiu Muoth, buca schenaus, cloma cul tun mischedau de beffa e humoristica: "Jeu proponel gl'assistent X, el ha gie saviu procurar che las talpas dattan mai pli en mes praus! "- In' autra gada, cura ch'ei setractava dell' elecziun d'in niev gerau, propona il Mattiu puspei igl assistent X, el hagi gie in cor ded aur e fussi franc habels de stumar ora inapulenta sin meisa ord bucca a 7 affons!" - De quellas beffas e leffas deva el a tut tgi ch'era buca sin corda cun el. Mo el era è el cass de tener si legher in'entira societad cun veras, bialas e spirtusas agnoccas, cunzun cura ch'el veva gudiu empau vinars ni vin valtina.

Che la STINA, la buna mumma dil poet Giacun Caspar, ha stuiu laguoter bia, e giu de far atras biaras grevas uras cun siu Mattiu, gliez savein nus tgunsch s'imaginar. - Ell'era ina dunna fina, modesta, migeivla e zun luvrusa, e siu viver, pitir e barhar han giu mo ina finamira terestra, numnadamein il quita e panzieri per siu carezau fegl Giacun Caspar. E sch'ei sedi, che gronds e meriteivels umens pil pievel hagian d'engraziar lur esser e success ad ina buna mumma, sche vala quei segir era per nies grond poet Giacun Caspar Muoth. Quella gronda carezia materna, ch'el ha giu la ventira d'astgar sentir e guder trasatras, era sco student els onns de petra miseria, ha enfirmiu sia voluntad e mai schau piarder el la speranza per in meglier futur. L'attaschadad alla casa paterna ed all'olma de quella, la buna mumma Stina, ha preservau Giacun Caspar d'in naufragi els onns de miseria e combat; ell'ha dau directiva al patergar ed agir agl um en las burasclas della veta. La carezia e la veneraziun per sia mumma han tenu el sidretg, e mai fuss el staus habels de sdegnar ni emblidar ils sauns e grads principis de viver, plantai en siu cor da sia sempla mummetta.- Duront plirs decennis ha la Stina gudignau siu paun cun far la furnera per ina gronda part della populaziun de Breil, recaltgond aschia dus raps per siu pauper fegl student. Denton, de vegnir reha s'ei buca stau; siu mudest gudogn steva en negin paregl cul paun tut aparti bien ch'el-la fageva. -

Dal temps che Giacun Caspar Muoth mava a scola primara a Breil existevan naturalmein buca tonts ed aschi stupents cudischs de scola sco oz. Mo igl impulsiv e svegliau buob legevi pari ordeifer il temps de scola fetg bia ord auters cudischs, sco per exempel las raquintaziuns de Christofel Schmid, translataidas en romontsch, lu era ils cudischs de Legendas ed il cudisch de canzuns dell' "Olma devoziusa". Che la lectura de quels ed auters cudischs han giu in'eminenta influenza sil buob intelligent e pleins de fantasia, ei negin dubi. Exprimend il giavisch d'astgar studegiar, tarmetta il bab Mattiu siu buob igl october digl onn 1859 - el veva pia 15 onns - ora a Sogn Pieder(Feldkirch) ella scola dil marcau. Ins ha adina sedumandau, pertgei il Mattiu hagi tarmess siu fegl, che saveva gie strusch in plaid tudestg, en ina scola schi lunsch naven e purmein tudestga, ferton che Mustér fuss gie staus pli maneivel e la plipart dils professers vessen gie saviu era romontsch. Giacun Caspar sto haver studegiiau ti mordio, pertgei igl uost digl onn sissu vegn el a casa cul meglier attestat de sia classa. Suenter ina stad plena de lavur sils funs dil bab, vess Giacun Caspar bugen puspei continuau ils studis. Il bab Mattiu denton, da lezzas uras aunc beinstont purun, tarmetta el quei atun (1860) giu Cuera sco commissionari ell'Ustria dil Zenn. Il pertgei e percum sa negin. Al giuven student pleins d'entusiassem ha quei segir buca plauschiu, mo al bab tuccav'ei d'obedir, e cun quei basta! Il tip svegliau ed observativ ha denton era profitau in bien-ton dell' occupaziun e dimora el marcau, mo eis ei stau donn, ch'el ha aschia piars in onn de scola. - La stad suandonta ei Muoth ualti segir puspei staus a casa a Breil, occupaus cul fenar. Quei atun, pia 1861 astga el, grazia all'intervenziun della mumma e de siu aug Francestg, se - render alla scola claustrala de Mustér, nua ch'el frequenta l'emprema classa reala. Quei onn de scola claustrala a Mustér, in center cultural e historic, para ded esser staus de grond impuls pil giuven Giacun Caspar. Siu spért poetic e historic ei vegnius svegliaus, aschia ch'el entscheiva gia a far poesias, era per tudestg. Pliras ovras ch'el ha scaffiu pli tard, dattan perdetga dellas profundas impressiuns historicas acquistadas en quei onn de scola claustrala. -

Ils proxims quater onns ei Giacun Caspar Muoth student gimnasial el collegi de Sviz. Era cheu sedistingua el, ed el auda denter ils megliers scolars, gie schizun en musica.

El eri il secund meglier pianist; sulettamein Gieri Schmid de Grüneck, igl uestg de pli tard, pudevi vargar el en quei rom. Che quei po constar, dattan gie sias biaras poesias plein musica e ritmica perdetga.

Da quei temps eran aunc treis giuvens de Breil a Sviz, numnadamein ils derschaders de pli tard: Gion Giacun Cavegn, G.M. Cathomen e Toni Cagianut. Ina gada ein quels treis ensem cun G.C. Muoth vegni sul Pass Pigniu en vacanzas de stad. Muort plievgia e spessa brentina falleschan els il trutg, aschia ch'els vessen gleiti el medem liug giu la sort de biars schuldaus dell'armada de Suworoff digl onn 1799. -

Cugl atun 1865 - el veva lu 21 onn - entscheiva per Muoth ina nova epoca studentica, pli turbelada. El fa la tschunavla classa dil gimnasi a Fribourg ed ei leu in dils capos della classa.- Cullasfinanzas a casa steva ei mal, veramein mal. Ils deivets eran carschi considerablamein, ed il Mattiu era terribel iritaus a vesta della fatala situaziun. Cura che Giacun Caspar era ella sisavla classa gimnasiala, il schaner 1867, succeda la catastrofa finala a casa: Mattiu Muoth sto schar ir scussiu; el ei sfurzaus de vender siu muvel e la gronda part de siu bi fatg per pagar ils deivets. Tgei effect che quei ha giu sil student Muoth, san ins s'imaginar. La depressiun, unida culla malsegirtad per siu avegnir leva sfraccar il giuven um della ferma energia virila. Entochen ussa eran ses onns de student stai umbrivai da grevs quitaus, ed ussa duevan onns d'aunc pli gronda miseria e pupira suandar. Pertgei che Giacun Caspar interrompa ussa ses studis a Fribourg, san ins buc, mo il matg dil medem onn, pia 1867, eis el a Losanna, probabel al gimnasi. En ina brev ch'el scriva a casa, deplorablamein senza datum, communichescha el il suandont: "Quei che appartegn la scola, vai pulit. Jeu sun carezaus dals professers e progresseschel fetg, mo vivel miserablamein cun in tec bier e paun." En la brev rapporta el era, ch'el stoppi dar uras privatas per recaltgar ils necessaris daners per saver pagar sia dunsena. Quei che impona nus ei, che Giacun Caspar fa neginas reproschas a siu bab Mattiu. El respectava el sco bab, malgrad sias grevas fallonzas. Biars en siu pei vessen tratg tut pil tempel en ed i en la direcziun che quels van, che ein pauc e vegnan nuot endretg. Tut auter ei igl agir de Muoth staus; el ha piars ni la curascha, ni la speronza, el ha teniu la dira ed engaldu; el ei en quei temps de grev'emprova semusaus sco um d'in character ferm, igl um cun energia de fier.-

Mo danunder quella forza ? Eis ei buca stau il patratg a sia cara mummetta, sco el numna' ella pliras gadas en la cantada dil " GIODER " , che ha teniu el sidretg ed enviadau en el la glisch de nova speronza ? La carezia materna che Giacun Caspar veva adina d'affon e da giuven e ch'el senteva vinavon, ei stada en quei mument sc'ina glisch el stgir dil stemprau, sc'in'ustanza el grond prighel dil vi-riveri,... ed el ei buca sviaus.- Ord ina brev, dictada da sia mumma - ella saveva sezza strusch scriver - saveva Giacun Caspar ch'ella sappi star per tscheins en la casa paterna e far paun vinavon pil cuminetel, e quei era per el in fatg consoleivel. - Siu bab era suenter la scussiun staus en piazza a Zuoz e suenter a Sogn Murezi, mo buca per ditg; gleiti eis el puspei turnaus a Bfeil. -

Stunclentaus dalla lavur e sfurzaus dalla miseria, sto Giacun Casper turnar tard gl'atun 1867 a Breil, nua ch'el passenta gl'unviern proxim. Schegie che siu avegnir era ussa incerts, lai el buca pender il tgau; el entscheiva a scriver. Sia emprema ovra ei in opus R H A E T U S , e lu suonda in drama J Ö R G DE J Ö R G E N B U R G. Omidus fretgs poetics ein denton mai vegni publicai. Pli tard, suenter che Muoth veva studegiau pli da rudien ils epichers classics, sco Homer e Dante, ha el giu anflau quellas duas ovras memia malmadiras. Rhetus vegn barschaus e l'auter mess en truchet, probabel cuagl intent de reconcepir quel pli tard en fuorma pli perfetga.

Ed ussa ? Tgei far, suenter ch'igl unviern era vargaus ? Siu bab era buca el cass de possibilitar in ulteriur studi. Dueva Giacun Caspar restar in miez studegiau senza in andant avegnir ? Sias ondas denton vevan meglieras finanzas e fussen stadas prontas de gidar el, sch'el vess saviu se-decider de studegiar teologia, mo quei savev'el e vulev'el buca far. Aschia veva el neginas autras letgas, che de prender persuls sia sort sin si'atgna schuiala. Cun ina leva valischa ed aunc pli leva buorsa, mo cun la benedicziun de sia mumma, serenda el quella primavera digl onn 1868 all' universitad de München, da lezzas uras in dils capo centers intellectuals ell'Europa. E cheu resta el 11 semesters. Sia miseria ei leu all'entschatta schi gronda, ch'el vul ina furtina semetter silla vart commerciala per aschia saver entscheiver a gudignar. Grazia all'influenza ed agid d'in bien amitg, sedecida el tuttina de continuar il studi universitari. Per vegnir tier dus raps stueva el pus-

pei dar uras privatas e copiar lavurs per signurs ed auters students, che vevan la buorsa pli pulpida che la sia. Il fatg ch'el ha temps ora stuiu durmir en ina combra ensem cun in calger ed in cusunz che luvraivan a München, dat perdetga, ch'el veva veramein miseria gronda. Perquei ch'el era beinvesius e stimaus, survegneva el silmeins per liung temps el HOFBRÄUHAUS ina suppa caulda gratuitamein, e sia tscheina consisteva il bia ord in glas bier ed empau paun. Quella pupira ha bein fatg el pensivs e trests, mo mai ha el seschau decuraschar dil tut. La solida educaziun cristiana el temps d'affonza e de gimnasi, ed il ferm li-
giom culla casa paterna a Breil han teniu sidretg el, ed el scriva da quei temps la poesia " Curascha ", che se -
cloma:

C U R A S C H A

Tgi che sin Diu
baghegi'il siu,
po mai dil tut,
po mai ir sut.

Curasch' haver
lein nus pilver
en tuts basegns,
en tuts mistregns.

Schegie ch'il tun
cun siu grev sun,
cun siu fraccass
il mund smaccass:

Jeu nuot tumess,
pertgei ch'jeu vess
miu Diu cun mei,
miu bab ch'el ei!

Aschia sa bein mo in perschuadiu cartent scriver!
Ils onns de München han dau ad el niev impuls poetic. Dan-
ter las meglieras poesias ord quei temps, biaras occasio-
nalas, auda senza dubi L A V U S C H D E S O G N
G L I E C I , che munta senza dubi in confess de sia car-
dientscha enten QUEL, dil qual el veva tutta fidonza. Ted-
lei mo treis strofas:

LA VUSCH DE SOGN GLIECI

Leu silla greppa en siu cuvel
urava Glieci pil pastur,
che pastga ella val siu muvel
e sa aunc nuot dil ver Signur.

Ils habitonts la vusch udevan
e serimnavan per tedlar;
il sogn mussav' ed els capevan
qual DIU ch'els stoppien adurar.

Ed il luvrer sper siu arader,
ed il pastur sut il glatscher,
tut cloma laud agli Spindrader:
gl'ei in nuegl ed in nurser.

La capo ovra ch'el ha concepiu a München ei senza dubi igl idil LAS SPATLUNZAS. El descriva cheu en fuorma concisa il di de spatlar, in usit ord la veta purila en sia vischnaunca nativa, pleins de poesia ed originalitad. Igl onn 1872 compara quell'ovra en la L I G I A G R I S C H A, ina gasetta romontscha, redegida da ALEXANDER BALLETTA, in amitg de Breil, sesents a Cuera. La medema gasetta ha en lezs onns era publicau biaras poesias ed artechels dal poet Giacun Caspar Muoth, ed aschia fatg el enconuschents al pievel romontsch.

Il pli impurtont tierm en la veta de Muoth ei stau igl onn 1873, pia cura che el veva 29 onns. A Cuera era ina plazza de professer per historia e lungatgs vegls alla scola cantonala scretta ora. Fatgs attents da siu amitg Alexander Balletta s'annunzia Giacun Caspar, - e cun success. El vegn supplicaus dalla regenza, che veva de far l'elecziun, de vuler seprestar tal e tal di a Lindau al representant dil Cussegl Pign. Muoth il pauper gianter, sto far empristar in pèr tschéccas caultschas e la cassacca e fa il viadi en quarta classa... El sto tuttina haver fatg ina buna impressiun, pertgei cuort suenter survegn el la legreivla nova, ch'el seigi elegius. - Ins sto cumprender la legria dil vegl student e de sia mumma Stina a Breil! - Quella elecziun astg'ins bein taxar per in grond eveniment historic,

pertgei ch'el ha rendiu al Grischun romontsch in de ses pli gronds fegls, il capo-poet romontsch. Per la litteratura romontscha entscheiva ussa l'epoca della pli reha raccolta, pertgei egl interval de 3 decennis ha Muoth regalau a nus products litterars de nuncomparabla bellezza ed en grond diember.

Durant ses 32 onns d'activitad sco professor alla scola cantonala passentav'el adina puspei sias vacanzas a Breil, silmeins aschiditg che sia mumma ha viviu. E lezza fageva bien cun el, ed el cun ella. Sias dimoras en siu carezau vitg patern han adina puspei impulsau el a fritgeivel luvrar litterar.

Ils 6 de fenadur 1906 miera el a Cuera. Siu tgierp ruaussa el santeri sper la venerabla catedrala, mo sias ovras, che fladan il vér spert e patratg romontsch, vegnan mai a murir, mobein per eternitads a dar perdetga dil grond defensur e cantadur de siu lungatg mumma. - -

Da Alfons Maissen

Omis dus impurtonts biografs de Muoth, ton Gion Battesta Derungs, sco era dr. Luregn Cagianut, han saviu sebasar per part sigl archiv personal de Muoth. Denter auter allegheschan els ina partida attestats per demonstrar il giuvn d'oreifras qualitats spirtalas a s. Pieder, Mustér, Sviz ed a Friburg. Igl attestat della scola publica a s. Pieder che nus reproducin era cheu el text integral, ei in auter che quel che ils dus biografs numnai han persequitau ed interpretau. Il present ei quel digl emprem semester, firmaus ils 29 de mars 1860, ferton che Derungs e Cagianut sebasan sil secund attestat, pia digl uost, oz buca pli existents. Ch'ei setracta cheu digl emprem, demuossa ina paregliaziun dils roms d'instrucziun. Egl emprem figurescha negin talian, ed en ortografia ha el cheu aunc buca acquistau l'emprema menziun, sco quei che G.B. Derungs alleghescha en sia biografia ellas Annalas XXII digl onn 1908.

Sco quei attestat a vart dretga, secatta era la brev scretta da Muoth alla regenza grischuna cun caschun de sia elecziun alla scola cantonala egl archiv cantonal. Ella datescha dals 4 d'uost 1873. Che sia nomina sco professor a Cuera ei stada de gronda muntada per nies lungatg, nossa historia e cultura, negin che dubitescha. Era Muoth sez sto esser staus incantaus de quei conclus. Ils motivs ein enconuschents e de dubel character, primo: la misergia studentica, secundo: bein surtut sia carezia per la patria grischuna, alla quala, schegie lunsch naven e senza speonzas sin migliur, veva astgau survir cun schar pulsar sia aveina poetica en pliras ovras stupentas. La cuntentientscha de saver luvrar dad ussa naven el centrum de siu pievel, ella Curia Retorum, s'exprima forsa era in stel en sia risposta alla regenza, copiada sin pagina 17. El lai buca rislir ina tala. L'elecziun ha giu liug ils 2 d'uost, e sia risposta datescha dals 4 dil medem meins, ina enzena de prontadad mai sudida per tgi che seregorda dellas relaziuns de posta de gliez temps.

Schulzeugnis.

Mueth, Jacob von *Brucels Cant. Graubund.*
 gebürtig, *14* Jahre alt, *katholischer* Religion, Schüler der
 vierten Klasse, hat im *1. Halbj.* Semest. des Schuljahres
1860 dem öffentlichen Schulunterrichte *sehr fleißig* beigewohnt,
 sich in den Sitten *sehr gut* verhalten, und bei *großem*
 Fähigkeiten und *sehr guter* Verwenbung die vorgeschriebenen
 Gegenstände folgendermaßen erlernt:

Die Religionslehre sammt biblischer Geschichte und Evangelium	<i>sehr gut</i>
Die deutsche Sprache, und zwar:	
Das Lesen	<i>sehr gut</i>
Die Sprachlehre	<i>sehr gut</i>
Das Rechtschreiben	<i>gut</i>
Den mündlichen und schriftlichen Gedankens Ausdruck	<i>gut</i>
Das Rechnen	<i>sehr gut</i>
Das Schönschreiben	<i>sehr gut</i>
Das Zeichnen	

Dieser Schüler verdient daher in die *1. Klasse* mit
Vorzug gesetzt zu werden.

Hauptschule zu *Feldkirch* am *29. März* *1860.*

Joseph R. G. Schmid
Lehrer.

Joseph Seyfried, Katechet.

Lehrer R. Schmid

Nus schein suandar cheu la brev de professor Muoth alla
regenza grischuna:

An den Erziehungsraht des Kantons Graubünden.

Tit!

Sehr geehrt durch die zu meinem Gunsten getroffene Entscheidung vom 2. August, erkläre hiemit die Annahme der gestellten Bedingungen, indem ich für das hohe Vertrauen danke und das Versprechen abgebe, mein Möglichstes zu thun, um den Erwartungen und Pflichten, die sich daran knüpfen, zu entsprechen.

Behufs näherer Aufklärung über meine Aufgabe werde mit dem Directorium in brieflichen Verkehr treten.

Mit Hochachtung

München, den 4. August 1873

J. M U O T H

La brev della regenza grischuna che surdat 1902 a Muoth la greva incumbensa de scriver ina historia grischuna, ei ad interim buca de catter. Ella dess entgin sclariment sur la lavur surdada a Muoth. Sco Pader Maurus Carnot relata cun raschun, seigi quella incumbensa che fetschi honur alla regenza sco era al commissionau, arrivada bravamein tard. Gia cuort suenter la festivitàd dils 25 onns professor alla scola cantonala, igl onn 1898, han sias forzas entschiet a sminuir. Per saver sededicar 1902 alla lavur gigantesca, vegn el levgiaus alla scola. El docescha mo pli historia. Mo gia 1903 ei Muoth malsauns, spussaus dil cor, mo serevegn apparentamein suenter ina cura a s. Gagl. La lavur historica agli surdada veva il grond historiograf grischun tschaffau pil cavez cun ferma manutta. 39 mappas pulpidas de material archival egl archiv cantonal, dattan perdetga de sia lavur preparatoria de vasta dimensiun. Sia forza de lavur extraordinaria vegneva sustenida grondamein d'ina vera memoria de cavagl, per semeglia de dir. Era en ses dis de malsogna era siu spért allerts e siu intern plein, de novs plans e projects de lavur. Igl unviern 1905/06 vegn Muoth grevamein malsauns, per part el spital della Crusch. La primavera para d'haver purtau

An den Erziehungsrath des Kantons Graubünden.

1121

Ehr. geachtet durch die zu meinem Gunsten getroffene
Entscheidung vom 2. August. erkläre hiemit die Annahme
der gestellten Bedingungen, in dem ich für das hies. Volk
danke u. das Versprechen abgebe, mein Möglichstes zu
thun, um den Erwartungen u. Pflichten, die sich daran
knüpfen, zu entsprechen.

Bezugs näherer Aufklärung über meine Auf-
gabe werde mit dem Directorem in brieflichem
Verkehr treten.

Mit Hochachtung,

Münch. den 16. August 1873.

Auoth, Jacob.
Herrn Dr. Othmar von Sarnen
zu
Münch.
Münch. 16. August 1873.
Erst. 3. October 1873.

J. Muth.

Levgera, e sias forzas paran de serecuvrar. Gia selegra il pievel romontsch de sia reconvalescenza e de siu niev cantar. Per dar lartg al sentiment de legria generala, s'annunzia in giuven poet, dr. Aluis Tuor, ella Romontsch dils 23 de matg 1906 culla poesia:

A Nies poet Giachen Hasper Muoth
sin sia reconvalescenza

La primavera ei arrivada,
svanius ei ussa prest il matg,
che ha ils munts e selv'e prada
cun niev vestgiu flurent surtratg

Da flurs la prada tut ei gaglia,
utschals aud' ins pertut cantar,
ed ils mattets ord mintga caglia
san legramein schuletgs tagliar.

Mo en Surselv' ei quietezia,
zatgei ei buca leu d'engrau;
negin che gibla de letezia,
ils pasters van cul tgau sbassau.

Il meglier cantadur fa pausa
e tschent'il maun sil staunchel cor;
Nus schein encrescher, ei ruaussa
schi ditg, schi ditg siu cant sonor.

Mo uss stai si e pren il calisch,
cun la Surselva printgas fai -
e pren la harpa giu dal salisch
e resonar tes miedis lai!

O conta po tras l'aura steppa,
che la Surselva audi tei!
Rispunder vegn ei dalla greppa:
"Nies Hasper Muoth ei frestgs en pei!"

Mo la legria cuoza buca ditg! In auter giuven poet e suandader che tonscha quella gada sia plema ellas larmas per la gronda lamentischun. Muoth era arrivaus alla fin de sias forzas, alla fin de ses gis terrestres. El era consumaus. Sur Flurin Camathias, da lezzas uras plevon a Breil, dat paleis ad in sentiment de tristezia digl entir pievel romontsch ella Gasetta Romontscha dils 12 de fenadur 1906:

LA MUMMA ROMONTSCHA

silla fossa de professor Muoth

"Tgei bragias, mumma, uss puspei,
tgei vas en rassa nera ?" -
"Il zenn de miert tuchei tuchei,
vegni cun mei a Cuera:
Miu mat, miu meglier cantadur
ei mess sin baun en bara!
Tgei sperdita e tgei dolor
per mei e tut la tiara!"

Il patriot vegn cumpignaus
sigl ault e vegl senterì;
siu cor da biars tschupials curclaus,
po en ruaus star eri;
mo ina mumma vegn plirond
neutier la foss'ornada,
senclin'afuns spel car affon
e plaيدا commuentada:

"Plirei cun mei, vus cantadurs,
bargi cun mei, o musas,
stei mal vischins romontschs e purs
sin spundas montagnusas:
quei ch'inflammava cors grischuns,
il meister de balladas,
el conta buca pli canzuns,
las levzas ein serradas."

"O niebel fegl, has dau honur
alla materna viarva;
a tiu cantar schi plein vigur
il cor grischun sesarva:
ah, uss eis ti setratgs naven,
scadin romontsch quei senta;
negin pli ha sco ti talent
e la premur'ardenta." -

Aunc ditg pil fegl, il genial,
la buna mumma plonscha. . .
Cheu port'in aungel celestial
in plaid a la Romontscha:
tiu cantadur schi ditg sco ti
el stat cheu en memoria;
ch'el resti verds, siu bi tschupi,
quei ha quitau l'istoria.

Denter biars auters che han scret commovents necrologs sur
Giachen Caspar Muoth, sesanfla era Hans Erni, che alleghe-
scha era l'impurtonza de quei grond poet per la promoziun
dil cant romontsch. El scriva denter auter en IL GRISCHUN:

"GIACHEN CASPAR MUOTH ei buca pli. Suentar liunga e dolurusa
malsogna, suenter entgins intervals de buna speranza, ha
nies bien Muoth finalmein stuiu suttacumber, profundamein
e sinceramein deploraus dagl entir pievel grischun e cunzun
dalla part romontscha de quel. . . .

Avon 4 onns ha il cussegl grond giu decidu de schar luvrar
ora Muoth ina HISTORIA GRISCHUNA, e cun la buna e ferma in-
tenziun de porscher a siu pievel grischun enzatgei endretg,
ha el priu a mauns la greva lavur. Mo strusch ha el giu en-
tschiet a rimnar il material, sche sesenta el indisposts.
El seremetta puspei, mo sia sanadad de fier ei svanida per
adina, aschia che mintga midada dell'aura ei el cass de met-
ter el en indisposiziun ed impedir el vid sia lavur. Pliras
gadas eis el grevamein malsauns e sto pertgitar lingas jam-
nas il letg. Ils 6 de fenadur ha la mort liberau el de sias
grondas dolurs, ed ils 8 de quest, l 9 o 6, ha ina enorma
massa de pievel accumpignau siu tgierp al davos ruaus. 75
cantadurs della Ligia Grischa e dil Chor viril romontsch a
Cuera, han canta la commoventa canzun "ALLAS STEILAS", sco
davos fervent salid a lur poet ed amitg Giachen Caspar Muoth!"

CUMISSIUN RADIOSCOLA

Franz Capeder, scolast, Salouf
Jon Semadeni, scolast secundar, Samedan
Luzi Tschärner, scolast secundar, Andeer
Alfons Maissen, parsura della CRS, Cuera
Adolf Ribi, representant dil Studio de Turitg
Christian Badraun, parsura della CRR, Cuera